

رغم إنتى مش فاكِر اسمُه

نصوص مصرية

محمود بطوش



رئيس مجلس الإدارة
د. أحمد نوار
رئيس الإقليم
إجلال هاشم
مدير الفرع
عبد الوهاب حنفي

مدير التحرير
سمير عبد الفتاح
الإشراف الإداري
شروق يوسف
أحلام يوسف

• رضم إتي مش فاكر اسمته
• محمود بطوش
• الطبعة الأولى،
الهيئة العامة لقصور الثقافة
إقليم القاهرة الكبرى وشمال الصعيد
2007 م
• تصميم الغلاف: د. خالد سرور
• المراجعة اللغوية:
سعاد عبد الحليم
• المراسلات:
إقليم القاهرة الكبرى - شارع اليابان
أسام قاسم سيد درويش
الهرم - الجيزة - فاكس: ٥٦٢٤١١٠
• الطباعة والتنقيح:
شركة الأمل للطباعة والنشر
ت: 3904096

الآراء الواردة في هذا الكتاب لا تعبر بالضرورة عن توجه الهيئة
بل تعبر عن رأي وتوجه المؤلف في المقام الأول.

رغم اتي مش فاكِر اسمُه

یا رب تنایا فی صومعة الذلک
شراء الایام عندکم فی سفار
کما تضرر رؤسک لرشوی
الحق امر امرأ راہم

محمد

۱۴۸۱۲۱۷۳۴

✓ رغم ایتی مش فاکر اسمہ

إهداء

- لأمي وأبوي
- لبنتي «ولاء»
- لزوجتي
- لأخواتي وأصحابي
- وللإنسان في كل مكان...
- أهدي هذه النصوص

محمود بطروش

نفسك فى إيه؟

الى اتربا
فى ظروف صعبة
وبيقول كلمة
يومية
فى الإذاعة المدرسية
الواد الألفا
حاول
أكثر من مرة
لكنه ماقدرشى يختم القرآن
ودلوقتى
بقا مرعوب
من اللى بيعملوه البنى آدمين
فى عز النهار
ولا كانشى أبدا يتوقع
إنه يفكر خالص

فى الانتحار
يا ناس
شايفين
أد إيه الحياه مشوار

أهو
من بدري صاحى
طالال ع الشارع
بيولع سيجاره من سيجاره
ومن غير سبب محدد
داخل خارج
زى المجنون
ويبلعن أولاد الإيه

يا هل ترا
لما على الحمام أخذته رجليه
واتفاجئ بواحد زيه
كان سرحان فى إيه؟
وإيه اللي خلاه

بكل شجن يودعنى
ويدندن كذا مع روحه ؟
قال لى
إنه بيفرح بالكوايبس
لما شفته فى آخر مرة
نازل
بيدور
على معنى لرعبه
لما فى الراديو سألوه
بمناسبة عيد ميلاده الستين:
نفسك فى إيه؟

بيموت فى المزيكا

صاحبى دا
ولياتى ع الحال دا
رغم إنه كان واخد باله ع الآخر
ما اعرفتش
إزاي ضربته عربية
مالهاش لون
لون قلب صاحبها زى الليل
شفت فى دمه شوارع
ما فيهاش بشر
اسوار من غير نهايات
طوابير طوابير
سلم مالهاش آخر
مزازيك
فى طريق ممدود
روح بتفرق زى ملاك مدبوح

شفت في دمه حاجات
مش عارف أوصفها
ازاى
يا ترى
قبل الفرس مايتدى رقصه
إيه كان جواه
ورماه
في نص الليل
ينزل أيها شارع
يمشى على مزيكا خاصة
مالهوش دعوة بالعربيات
يدخل فى الرقص
وما اعرفشى ليه امبارح
فجأة
وبدون مناسبة قال لى انت حمار
وضحك لى ضحكة عفاريت
ونزل
زى عوايده
نفس القصة

نفس الرقصة
حسيت بحاجة خلتنى بكيت
اتمنيت
لو اقابل كل اصحابى
على أول جرحى
وبحق حقيقى
يقولولى طز فى الدنيا دى
نفتح بابنا
نرقص
رقصه جميلة
وأخيرة

بورتريه

فى ليلة راس السنة

ديا

بورتريه ليا

عريان

زى ما جيت للدنيا

وروحى بتسألنى

لفين

يا خطوتنا الجاية

ضحكة

فى آخر الليل
الكراسى هه بتبتدى تاخذ نفسها
بعد العمال مايبغسلوا الفناجين
من كذب اليوم اللى فات
هنا
النار أهى بتموت
فى الميعاد دا
بيهل
زى حطب القطن فى سماره
وطويل زى الفراشة
مليانه إيديه بجرانين بكره
واقف
على طرف القهوة
على رصيفها الجديد
على رصيفه القديم

بيقرا
وما يبقراش
ليلاتى
وهات يا فرجة
على بكرة
ببلاش
وكام دمة على دى الصورة
وبعديها
فى الحارة السد
تحت الشبايك المتوارية
تجلجل ضحكته المشهورة
أنا اموت
بس اعرف
مين اللى قال
إن الناس اللى بتضحك
هى الناس المقهورة
وعلى الحال دا
ليلاتى فى ميعاده
حته من بلدنا

جرائينه تحت باطه
أعز من اولاده
وضحكته زاده
واحد
واحد
من العاشقين الحقيقيين
كان وكانت ولسه بتشتيه العين
ببلاش
يافرجة على بكرة
فى الميعاد إيّاه
تموت حياة
تتولد حياه
وانا
ليالى طوال باكون ويّاه
وسنين تانيين
ياعين
ياليل
ألاقينى مدفون
فى السرير الكبير

وبأجل
ضحكة
جوايا
قديمة
لبكرة



رزقه

زى ما ربنا قال

يوم بيوم

عايز ومش عايز

غير الستر

كداب لو غير كدا ح يقول

٣٦ سنة

بالساعة واليوم

وأحلامه

لسه مالهاش حدود

وأخر كلامه

طالما ربك موجود

يبقى كبير أكيد

٣٦

متجوز

ويعول عيال غير عياله
ومبهدله إيمانه
بيفهم فى الناس
عاشينها أنا وهو
طول وعرض
وتروحي فين
ياكيميا فى الكون
للى سهران فى بيت
يشبه لبيتى
ولاً
للمزحوم بحواديته؟
عرب أمريكان يهود
تعيشى يا بلدى
يا أول الوجود
أنا و بكل عزيز أحلف
الدمع ما يعرف عينه
٣٦ سنة
بالساعة المظبوة واليوم

حالة

حاسس
لا .. شايف
إنى فى صحرا
وكإن قطر ماشى فى دماغى
فيه صوت
مالينى
خارج داخل
فى ودانى
صوت وحدانى
وكإن حاجات ياما
مترتبة فوق بعض
فوق بعض
نازلة ورا بعض
و
ب

الشارع متلخبط

بنى آدم
مش من لحم ودم وبس
بنى آدم
طالع من حدوتة
ويدويك داخل فى غيرها
آه لو اعرف البنى آدم دا
ليه قام لامم بعضه
وداخل فى السر
فى النيل
فى نهار وليل
من أد إيه من السنين
ما اعرفش
وبرغم إن الشارع متلخبط
متلغبط
دا ضباب ودى مطرة ودا طين

ياہ.. ع النضارة اللى

ع العين اليمين

وبين الحين والحين

بيجز على أسنانه

ف

يلمع أكثر دقنه الأبيض المدهون

أنا

قربت يعنى شوية منه

لما رحلت في التاريخ

هناك

بعيد جنبه

يا خسارة

كل الی عرفته عنه

إِنَّهُ

بدال ما - يجاوب

آخر سؤال

عن السلام والذي منه / سمحوله المراقبين

اللاتنين

إنه يولع سيجارته

وقعد ساعتين كاملين

طال

من شباهه الوحيد

وبيكتب

عن العلاقة الى

بين العلم

وبين الدين..

أنا ومين

أعوذ بالله
ما اعرفش
كل ما ابتدى أكتب قصيدة
لبنتى
أشوف الشعر
بعينى الجديدة
شيطان وبيرمح
ويتوه منى
فى بلاد بعيدة
نرجع للبداية
أنا ومين
نلاقى تحت البحر نار
وحوالين الجنة العريضة أسوار
يا سلام
أحلى ما فى بنتى إنها بنتى

وأحلى ما فى الشعر
إنه مشوار
بس انا مازعلتش
لما ماتكبتش القصيدة
ولا قلتش
ماعلشى
يا حبيبتي
لما تكبرى / ومع الكلام تاخدنى وتدى
ح تعرفى إننى
عايزك للحن ماتخلصيش
وفى دنيك
ماتستعجليش
زىي كدا
وانتى بتضحكى ضحكك

شهد

البحر غرقان
لا - جزر
و .. لا - مد
ولاموجة فى الصخور الرخوة بتهد
ولامركبة بتمد
معقول
ريحة اليود كمان بتكذب
وكل مادا بيضيق الفضأ الاسود
ولحد هنا أنا والله ماتعبت
لكنى عشت
وشفت
مصلوبة النوارس ع الحد
لاسكتوا بهزل
ولاغنوا بجد
يا ناس

خلاص
دخل اللباب م الباب
وكل الى رفع عينه
يا عيني
مات واقف
يا أهل الله
يا الى جوة
ح نعمل إيه
كل الشبابيك
مش جاييه غير الصهد

إلى قرىتي الغالية.. نجع الحى

رغم انی مش فاکر اسمہ

الكرسى من تحتيا
بيقوم وبيقعد بيا
نفس القومة من نومى
لما كنت اسمع صوته
فاكر
و - أنا .. فى أقرب .. أودة
ع التربة
حواليا اكوام من أوراقى
قلل قلل
كنت اطلع
أتهجى عيونه
أتونس لحظة معاه
فـ
بيص فى وشى ويضحك بس فى سره
قال لى فى مرة
إنه سقا
ومراته ياما باعت من ورا ضهره القربة
آخر مرة رأيته
فى النجع

قبل ما اروح ورا صاحبي الشعر
قال لي طلقت الدنيا
وفي تقديري
ماطلعشي منها غير بقلبه الأبيض
- قلل قلل قلل
اتبعترت
ماشي
خلي الباقي
- اتبسم لمين الجرسون
على أد ما اقدر
لميت روحى م الكون
فريرة ع النجع
ع البيت
على نفس الكنبه
استنيت
فات نهار
نفد التالت
ولاجاش
ياحواش

الترعة بتاعتك يابلدنا
ماعادتتش تبل الحلق
- قلل
- قلل إيه ياعم محمود
ع النجع كبس الليل
زى الغول
ازاى رح تشوف
السهرة سم
وماعادشى
تسمع كحة عواجين
ولاعدودة على اللي غاب
حتى كلابنا
ماعادتشى بتنبح ع الأغراب
يااااااه
من كام سنة
وانا
لا.. هناك.. و..لا
هنا
والدنيا لسة ليل

نفس الصرخة الدبّانة

مش قادرة حتى تتم الكلمة الواحدة

- قلاد اااااااا

- قلدااااا(.)

زى ماینط عیل ملدو غ من عقرب

نطیت ویادوب ح اخده بالأحضان

ماکنشی باصص لیا

وعينيه اهم سهمين

شاقين العتمة واصلين للسما

کملت قراية وشه

عط عطش عطشا ن

خذ منى القلة

مادريتشى

إِنْ كَانَ شَرْبٌ وَلَا

ساب جوابیا حاجات

.....

ومشی

أوقات

بيحب الفرجة
وفى أوقات كثيرة
بيحب يتخلص من اسمه
ومن الهدمة اللي على جسمه
ويفضل يمشى
يمشى
وانا وياه
مش غصبن عنى
أروح
مطرح ما بتاخذنى رجلى
انا اللي
ضيعت تلتين عمرى
فى التمنى

بعد أول محطة

الى من البلد دى

الى ما بيونش

من سنين

ياما

قابله

فى القطر العجيب

بيبيع الأغاني

للسهرانيين

دا

باع للى مات ع الكرسي جنبى

بعد أول محطة

سنة ٢٠٠٠

وردتين

هوه

إياه

زى القطر
من تلت اربع تيام
لمحته فى الميدان المش واضح
على كرسى ييمشى
بيرسم المراجيح بجناحات
زى الطيارات
وبيرسم البنات عصافير
وكان خيول
وقوارب بعيون
وشبابيك متواربين
و
وبيناديهم كلهم
فى أوقات كثير
يا ناس
بأسامى البنى آدمين

سبحان من جمعنا

عدى النهار والمغربية
ما اعرفش
إزاي
حسيت بارتياح
ولحت قلبي ببيتسم ابتسامة حقيقية
لحظة ما قتلت عبدالحليم
شوية كدا
وقعدنا حطيت العيش
والميا
واللى فيه النصيب
من غير مانقصد
فردنا الوطن
جرنان قديم على طرف السرير
سبحان من جمعنا
٩٦/٦/٦

اتربعنا
اتنين ملايكة لابسين تيشيرتات
واتنين أنبيا
- الله
- أكل الناس الغلابة حلو ياعمو بطوش
بس اخويا ميدو ما بياكلش
- من إمتى
يا اولاد اخويا
والحمام بيحذف علينا أرواح الشهدا
ولحد فين
السحاب الأبيض طاير لبعيد
لو بايدي
كنت اخلى
كل الدنيا دلوقتى عيد
بوسة
يا هشام عشان غربتى
طب عشان خاطر الشياطين
الى حوالين القعدة مصهللين
حببتي فين !!

لا

فين القصيدة اللي ما - تقتلكيش

العزبة أهه أهى

وماتسألوش حد ع النخل يا اولاد

على باب كل أودة وردة بلاستيك

قرب

نص شعر راسك شاب

والشعر الله يخليه مالى المطرح

هل دايمه عين البنى آدم بتصدق

جرب

إزاي يا ابن أبوى

ح تعدى عليا بكرة

وانا اللي خفت ابكى ع القدس

أو على غيرها

ماحدش يصدقنى

دا - أنا كنت اموت ساعتها

معقولة

مد عينك

تشم ريحتك فى عيالك

وتحس الجرنان المفرد
مقلوب
ولسه الأكل كثير
بابا
بس كييف سجائر وشاي
قول
الحمد لله
المترو الآخراني أهو جه / جا
قول كمان
الشهر - دا - ٣٠ .. ولآ.. واحد - و ٣٠
النهارده
على خير عدى
والمغربية حنة قهوة
والقهوة بالبلدى يعنى
لسة الوطن حنين ومتنيل
النار والمشاريب
ملك الغلابة والمجازيب
دخلت انا جهنم برجليا
فرحت فرحة طفولية

أما شفت الصينية
بترقص فى إيد الجرسون الجديد
نطيت من الجنة
على نكتة حلوة
بين الصعايدة والمنافقة
حاسبت ع الشاى
وعلى خيبتى الثقيلة
أنا الواحد
المش ناقص / ناقص
زرعى فى البلكونة بين الحياة والموت
العرش ملىان ع الآخر
نفس الحسين سهران فى سريرى
أما كليوباترا أهى
ع الجدار قدرت تنام
ما اعرفشى
إيه اللى جاب سيرتك دلوقتى
يا ناصر
غصبن عنى
رعشة أول مرة بكر عرفتها

لسه بتسرى فى روجى
أما الهوا
هوانا خارج بلا عودة
يا صبر أيوب
لسة مقفولة إزارة الكوريكتور المقفولة
لسة الاصفر والابيض ع البلاط الفقير
بيتناقرو
يا عيال
عينيا بتجرى جرى
وقلبى بيدمع
سندت ضهرى ع الكرسي أشتكى لى
إيه المتعلق ع الحيط دا
«محمود» بشحمه ولحمه
ولا / دى / روحه
ولاً - دا.. حد.. تالت؟
شوف يا
حاجة عزيزة عليا بين السما والأرض
شوف
زى ما يفر غزال هربان

النوم منى طار
والمح حط الرجال فى روى وارتاح
بصيت لسقف البيت
وكأنى أول مرة اشوفه
وصيتك يا غالى وقوى وعالى
سلم لى ع الأنبيا وقل لى
أنا اللى أول حاجاتى
زى آخرها
ليه خفت أ..ل..م..ل..م..ه... ا
ليه خفت أَللمها؟!

والزمن طويل

مين المسافر
على طول على طول
نفسه في وطن بكر
منه للشارع
لا أسوار
ولا يحزنون؟
أطير في سماواته لحد التعب
وارتاح في حضنه
ساعة ما نتلم
أنا وعيالي العصافير
والزمن
طويل

مربعات من ديوان الواو

ياكلب إلع بديك
جالك زمان المنافع
مجروح وتضحك لغيرك
واللى بلا ديول ما نافع

بأنده عليك يا عم
قالوا معاك الطب
وح تعمل إيه فى الهم
لما القدر بيطب؟

ليل الوطن مش قصير
عايز قمر لايسافر
يطلع علينا ينور
وفى ضيه نقدر نعافر

من بين ٤٠

الغربة مش إنك هناك
الغربة مش إني هنا
رغم ان إيدى فى إيدك
وفى دمي بيجرى نشيدك
لكننا
ما احناش بنفهم بعضنا

ومنين راح امشى لك يا شابة
والطرق كل الطرق متشابهة
قربت منك كتير كتير
قربى قربى منى حبة

الشوارع بدلت أساميتها
ماعادشى غيرنا/ بس فيها
ماتزوقيش الكلام يابنية

العمر سكة وتهنا فيها
لا / لا الكلام زى السكوت
ولا الحيطان تعمل بيوت
وأنا فياً كام حاجة بتناديكي
واحنا سوا جوه التابوت

مش واحد

أنا ليه دايما
خايف من الكمسرى
رغم إنى باكون قاطع
وباخاف أعدى
حتى والإشارة مش فاتحة
والله العظيم
أول مرة نزلت الميدان
كنت فاكر
زى ما قال التليفزيون اللى فى الخرابات:
العرييات بتسمع صفارة العسكر
أنا
بعيونى دول اللى فى نص راسى
عديت
وعرفت
العرييات مش واحد

والعسكر مش واحد
والمقتولين مش ...

لَسَّة

أصعب حاجة
وأمر من المر
طعم السكات
يامين يغنى دم الشهيد
دم الشهيد شبابيك
ورملى القديم الجديد أشجار
يا سلام يا عبد الرحمن
لَسَّة
قادر الجيتار
يعشق زحام الاسطوانات
والأغاني بتتولد
فى الغلبانين
والغلبانات
يامين يسمى
إبنى بكرة
وحزنى اللى فات ترنيمه
لأننا احنا أول من للدنيا

غنىنا
وعلىنا
طول عمرنا كدا
وطول عمرها العين علينا
عبرنا.. زى الريح
انتصرنا زى الكتاب ما بيقول
ودا ما كانشى فى يوم وليلة
لأ دا مشوار
من ناصر للنديم
لصلاح لأحمس لمينا
النصر دا
بأيدينا
يكبر
الله
كام أكتوبر ح يعدى
والمعركة
ياما
ترعة مع زغروطة
«طوبة على طوبة»
لسة
العركة منصوبة»

دنيا

مين فينا
فى أول الدنيا
واحدة زيك
ولا
واحد مليانة روحة بحواديت ياما
وما بيحلم إلا
إنه ياخذ نفسه
فى حنة ضلة؟
يا جماعة حدش شاف البنوتة
اللى كانت بتغششنى الإملا
البنوتة اللى صرخت حاسب:
- مسمار فى الدكة
ياه
مين فينا دلوقتى
يا دنيا
فى آخر الدنيا؟

بنت محمد محمود

شمعة العيد
وام النهار
طول عمرها
طالعة
بعون الله
بتحط الفطار
لخلق الله
البرسيم البلدى للأرانب
والحجازى ماتعرفهوش قوى
البراح للحمام
الديك البكرى للشيخ الرفاعى
ولسة الإيدين الحنينين
من نصيب القطه الوحيدة
ياريتنى
كنت مت

ولا شفت
دمعتها اللي فى القلب
على اخواتى الشهدا
بلا حرب
طالعة
والدنيا لسة ليل
بترش تراب البيت
بالميا
وبالحواديت
أكذب
لو ما أقولش
ورا كل حدوة الله
دى كل حاجة موجودة
مش شرط تبقى موجودة
أمى
فرحتها طرحتها
ورثها نخلتها
دنيتهما آخرتها
وفى الدار

كام حدوتة
لسة
الفانوس فى إيدها
قمر ببلاش
صاحى
فى جيبها
من امبارح
منديلها القماش
وفى ركن الأودة
علبة الميا
والمصلية
مع الفوطة محطوطة
والكنكة على النار
وتحت السرير
النعناع والحلف بر اخوات
من زمان
الكحة لم بحت صوتها
وأخر برشامة
فى الشريط قلقانة

وبتدعيلي
بالسلامة ترجع
واشيل عيالك قبل ما اموت
يا ولدى
يهدى عليك العاصي
وراكب الكراسي
وانا زى ما تكون
تهاليل العيد وتكابير العيد
جايه من بعيد
سايه الدنيا كلها
وجايه عليا مخصوص
شوف
الحمام طار ولا جاش
وأولاد الحلال واقفين
والرفاعي
من أد إيه ماعداش
واللى على الكراسي
لسة
قاعدين

وهى من إمتى
طالعة
لا كلت ولا ملت
ولا مالت
ولا زالت
بنت محمد محمود
شهادة ميلادها مفقودة
قادر
يكتب لها العودة
أنا اللي مستنى
إيه اللي طلعتنى
فوق كدا لأمى
فتحتلى الجنة
دخلت معنى الكلام
أخذنى عشق الفرجة
مش التمنى
وأمى
ماتحلالها العدوودة
إلا فى صبح العيد

ما اعرفش
إن كانت على الميتين
ولا على العايشين
وانا غصبن عنى
حاجة بطعم الملح
نازلة على روى
والعيد
بس فى الميكرفونات بيزيد
والناس أهى بتجرى
زى مايكونو بيهربوا
لشئ قريـب
وبعيد

الصحاب بيقلوا

..إلى إدريس على

بيفكرنى بالكاتب الفرعونى الجالس

أول ما اشوفه

يتهدألك

زى الخايه اللي دلقت طحينها

أول مرة عرفته

طفل عجوز

فاتح شباك الصغير

وبيشب يقرأ العالم

وعلى أقل من مهله

وانا كل ما اشوفه

احترار أكثر

هل دى نظرة وداع منه للدنيا

ولا دى

أول طلة ع الكون؟

مين فينا المش مجنون

وح يعمل إيه

لو صاحبه

لاقدر الله

اتجنن

واتحول لملاك متلقح

فى قلب المدينة

أو أصبح فجأة

من فضيلة الحرامية المحترمين

ما اعرفش ليه

ضحكت ضحكة كدا أنا نفسى مش فاهمها

لما قال لى

الصحاب بيقلوا

وماعلقتش

غير بكلمتين اتنين

لا ليهم طعم

ولا لون

ما اعرفش ازاي

رغم أنه قاعد معاى

فى البستان
وبنشرب شاي
لكنه قدر وسهاني
خدني
لبلايه البعيده
أنا باعترف
فى حضوره دلوقتي
باني مزيف وجبان
لما ضحكت وقلت له كلمتين
ربنا معاك
رغم إني ما كنتش شايف غيره
وهو بيطل
من شباكه الصغير
يمكن يلاقى حاجة واحدة
يعشقها على طول
يمكن تكون شجرة أو قطة
أو حدوة حتى !!

وكأنى مش عايز أقول حاجة

فيه حاجات كتيرة
بتضيع منى
وانا
لسة
بادور
على نفس الحاجة المش موجودة
إيه اللي خلا
كل الحواديت
اللى فى حياتى
حواديت وبس
والشئ الوحيد اللي شايفه
على الأقل دلوقتى
أهو «.....» طريد
هوه اللي خلانى
أطير لبعيد

روحي على جناحي
فرحان
تربست عليا البيان
و
بارقص
في هدوء
مع مبتين كثير
على مزيكا من تألّفي
في أوضة
من غير سما
لو مش مصدقني
ما تقولش
أهي سنين ويمكن تعدى
بس وريني
إيه الجديد
غير إن مافيش
أى حقيقة في كاف التشبيه
وكأني مش عايز أقول حاجة
لأني

ساقط من الامم

7	الإهداء
9	نفسك في إيه
13	بيموت في المزيكا
17	بورتريه
19	ضحكة
23	٣٦
25	حالة
27	الشارع متلخبط
31	أنا ومين
33	شهد
35	رغم إني مش فاكر اسمه
41	أوقات
43	بعد أول محطة
45	سبحان من جمعنا
53	والزمن طويل
55	مربعات من ديوان الوار
57	من بين أغنية
59	مش واحد
61	لسه
63	دنيا
65	بنت محمد محمود
71	الصحاب بيقفلوا
73	وكإني مش عايز أقول حاجة

رقم الإيداع، ٢٠٠٧/١٠٢٠٤
الترقيم الدولي، x-326-437-977

شركة الأمل للطباعة والنشر
(مورافيتلى سابقاً)